

四庫全書

子部

欽定四庫全書

子部

書畫彙考卷五十九

詳校官中書臣沈 颺

侍讀臣孫球履勘

總校官進士臣朱 鈐

校對官主事臣陳文樞

謄錄監生臣任銜萱

欽定四庫全書

書畫彙考卷五十九

刑部左侍郎卞永譽撰

畫二十九

明

陳淳

陳道復烟密疊嶂圖并題卷

人恒謂畫曰丹青必將設色而後爲專門而米氏父子

戲弄水墨遂垂名後世石田先生嘗作水墨花枝亦云
當求我於形骸之外畫亦不可例論歟道復漫書

予嘗見米南宮父子雲山特臻玄妙而倣之者如
元之方壺國初時錢塘戴進雖各底極方特具體
而微戴聊窺其一斑耳未之擬也如我白陽陳先
生用筆瀟灑覽如汗漫無統而波瀾有緒識者云
縱橫二米之間者此卷也予以爲然不知鑒者亦
與之否江夏黃學曾

外錄

珊瑚網云余有白陽大幅石塘圖設色工緻全學
趙松雪不獨縱橫二米間也

陳復甫山水并題

何處尋高隱雲山入望賒水邊林闕裏茆屋是誰家
烟迷山下寺雲動樹中山一片朦朧景相看未擬還
共步綠橋畔放懷同和吟誰知白頭叟來結野雲心
雨過小猶滴嵐光翠不分繁烟起深樹縹緲接歸雲

陳白陽做大癡筆并題

淺色山水

樹色搖空翠，泉聲落寒玉。竭來肆幽討，中夜自秉燭。陳

淳

道復山水并題

著色

綠樹藏烟靄，靄青山過雨。娟娟一幅蒲帆，高掛十里荷

花徑穿

道復山水并題

水墨

幽人去泛五湖船，湖上青山隔暮烟。紅樹白蘋秋滿目，

詩家生意迴無邊

獨坐船頭理釣絲水清無處覓鰲魚不如歸向茅亭裡

下個工夫飽讀書

陳復甫老圃秋容圖并題

淺色大幅
汪氏鑒藏

嘉靖乙酉春仲望後恒齋以此紙索圖談及石田先生
嘗作老圃秋容蓋欲余彷彿之也圖畢漫記白陽山人

陳淳

壁窠
書款

白陽山水

出門大江橫銀濤數千頃
仙子御輕颺環佩搖虛
影中宵月無光天地水壺靜
輕盈何所之飛夢西

湖冷王延陵題

道復杏花雙燕圖并題

杏花經雨濕燕子逐風斜
一段江南景幽人自念家

白陽山人菊花竹石圖并題

幅中

近水人家覺倍清
籬邊花竹甚分明
筆牀茶竈却關情
堪嘆光陰真倏忽
任教人事儘縱橫
往來榮辱底須驚

右調浣溪沙

陳白陽折枝花圖并題卷

與造物游

書卷首

興慶池東艷沈香亭北妝清平有佳調永夜奉君王
東風破嬌靨紅雨濕開花春滿秦川棹漁郎嫌路賒
花事已零落辛夷獨盛開紫苞含玉瓣翠葉帶新開
紫肉破新粉青綬有餘馥美人何飄飄迢遞出楚谷
晝永睡方足起來花照人朱纓蹙絳縠節事又重新

牡丹 桃花 木筆 幽蘭 海棠 崇

玉質稱禪友脂膏比衛姜月中疑有影風際騰聞香
沙河春雪盡海使忽西來帶得名花種香生紫玉環
北堂無雜植幽砌著幽花翠葉翻羅帶金莖結綺霞
秋風吹宿草白露浥嬌花滴滴朱顏在相看亦自賒
一入長門裏秋衣只淡妝丹心應自許日夕向朝陽
翠葉翦湘縠幽葩抽玉簪一枝對書幌坐久淨塵心
老桂含秋色天香散玉墀姮娥解人意折贈最高枝
葉舒犀甲厚花吐鶴頭丹不逐東風艷偏宜帶雪看

茶山花桂簪玉葵秋棠花萱瑰玫瑰葡萄

不見姑射久驚看綠萼華雪消春未老獨立粉牆斜

綠萼

白陽山人陳道復寫

道復梅圖并題

竹籬巴外野梅香帶雪分來入醉鄉紙帳獨眠春自在
漫勞車馬笑人忙

梅花得意先羣芳雪後追尋笑我忙折取一枝懸竹杖
歸來隨路有清香

陳復甫桃枝圖并題

紅粉低垂玉一枝佳人倚醉曲欄時
春來有待消殘恨
憑仗東風莫浪吹
白陽山人陳淳

陳白陽玫瑰圖并題

暖風吹酒玉頰酡宛轉輕柔壓繡羅
一笑嫣然真自擬
太真扶醉欲如何

簇樹朱花鬪曉妝滿庭龍麝一時香
佳人睡起渾無事
折得繁英疊綵囊

春盡沙河雪未迴一枝紅玉意徘徊
漢家已進榴花艷

此種新從番使來 道復畫并題

復甫秋海棠圖并題

翠葉紛披花滿枝
風前裊裊學低垂
牆根昨夜開無數
誰說秋來少艷姿
道復作于五湖旧舍

陳白陽薜荔園圖

深讀太傅王公志
震澤稱兩洞庭之勝
往歲舉進士與今侍
讀徐先生子容爲同年
先生西洞庭人也
太傅公之言曰西山之起
甲科實自子容始夫

山水之勝洩之乎人高賢之以聲光垂世也建置
經位心目之所及則山益高水益深景益清遠造
化之巧所不能與者又托之乎人若徐氏之於洞
庭洞庭之有薜荔園是園之廣凡數畝地產薜荔
因以名園云園之景凡十有三曰思樂堂曰石假
山曰荷池曰水鑑樓曰風竹軒曰蕉石亭曰觀耕
臺曰薔薇洞曰栢屏曰留月峰曰通泠橋曰花源
四時朝暮之變態無窮而高下離立足以當欣賞

而游高明可謂勝矣正德十二年十月之吉賜進

士出身翰林院編脩文林郎經筵國史官上海陸

深謹記

按後題十三景內所謂釣磯者記中誤失之徐子容名縉

薜荔園辭

內亦遺栢屏

爲山兮既仞爲池亦尋宛水石兮斯在昔之人兮

此心水汪汪兮石磊磊嗟伊人兮不待堂既構兮像

懸我山嶽兮池海思樂堂

屹有峰兮湖之中水石際兮叢叢彼日夕兮浪以

風於我石兮撞春倚茲望兮南東維此池兮此峯
峰之下兮湖通盍往觀兮焉從善齊物兮若翁

假山

樓吾俯兮清流流之涯兮幽幽日徘徊兮延佇將
舍此兮焉求 水鑑樓

庭脩脩兮踈竹迴巖風兮鳴玉軒我倚兮無言羌
獨歌兮淇澳 風竹軒

蕉披披兮石矗矗紛滿亭兮芳叢芳叢兮柰何懷

佳人兮蹉跎 蕉石亭

臺登登兮山上田畝畝兮山下穡日力兮君欣君
復閔兮農之苦 觀耕臺

葦葉兮朱英洞窈窕兮若房悵青春兮遲暮猶有
寄兮餘芳 薔薇洞

采采兮荷花西之渚兮東涯水天風兮香遠淹中
洲兮日斜 荷池

月明兮峰景既東兮復西指佳期兮夕騁扣環竇

兮栖栖 留月峰

澗將斷兮有石下潺湲兮玉聲步既度兮返顧予
焉知兮何情 通冷橋

武陵胡然兮震澤隈花與水兮沿復洄悵尋源兮
不見見水流兮花開 花源

有石兮水濱俯幽藻兮青蘋魚鱗鱗兮迎予夢烟
月兮千春 釣磯

正德己卯九月望後五日二泉邵寶書于惠山之

松風閣

咏薜荔園

思樂堂

肯堂欽古訓修祀報前功
酌洞歌行潦采蘋遵召風

假山

磊竒成我山雲氣遽裊裊
尺水即溟渤拳石是蓬島

水鑑樓

風吹池萍開
天空水如鏡
幽人時凭闌
下看行雲

影

風竹軒

吾軒自有竹
暑月常寒聲
山靜無風時
滿林空翠

生

蕉石亭

看石忽有詩
攀蕉書其上
夜來雨打葉
驚聞金石

響

觀耕臺

洞庭有興雲太湖無落波登臺問農者不勤將謂何

薔薇洞

洞口薔薇密石花壓雲濕曉采枝上露不知鶴飛出

荷池

山風吹水香脫巾池上坐盈盈千歲龜飛上荷葉

卧

栢屏

堂堂千尺材爲屏忽屈曲終抱凌雲情不改歲寒

綠

留月峰

峰奇自成竅似月非有心月來爾何意徘徊光與

深

通冷橋

雨通厓水響石梁裊山礪晴天挂一虹溪斷雲不
斷

花源

落英泛流水點點如飄霞爲有問津者不敢種桃
花

釣磯

磯根浸寒水細草綠如髮夜魚不受餌石上坐秋

月

北郡李夢陽

抗楹臨清池，䟽牖面層島。
几筵列俎豆，周除藝花草。
賢哉肯堂嗣，緬彼作室考。
思樂堂

采石湖中央，爲山湖上曲。
雲生牕裏岫，竹覆階下谷。
萬壑空盪胸，九仞迴在目。
假山

池開影層榭，裊裊千尺映。
鑒止百物停，澄思萬感定。
何必尋匡廬，照膽扳石鏡。
水鑑樓

叢竹羅軒中迴風一蕭森綠水貯瑤彩青岑流玉
音娟娟翠袖女泠泠朱絃琴 風竹軒

種蕉覆山石幽意助遐敞風院落夏陰雨簷送秋
響迷鹿悟真夢書葉豈虛獎 蕉石亭

亭亭山上臺阪阪山下田綠叢屯宿雨春犁破新
烟勞勞車馬客安知沮溺賢 觀耕臺

薔薇繞薛洞丹葩結青蔓縈烟翠亂裊泣露紅逾
爛懽懽忘日夕娛遊在春旦 薔薇洞

覆水荷葉暗出水菡萏長風翻翠蓋倚日照雲錦
張齊聲江南弄獨和淥水章 荷池

結栢爲門屏盤條翠如織蒼然烟霧裡詎改風霜
色日夕不垂帷歲寒未相識 栢屏

雲賽像月窟始識中峰奇團圓掛蟾影瓊龍映蛾
眉傾崖光不側長攀叢桂枝 留月峰

山根坼斷崖獨石裊垂梁泉源瀉鳴雨波瀾遡風
揚炎天拂枕簟觸石聆笙簧 通冷橋

盤盤垂釣石宛宛

關

池隅翳荷窺浴鷺牽藻引遊

魚試詢淵上嘆何似臨池娛釣磯

池源通中湖流水浮飄花窈窕汎朝日潺湲弄明
霞倘逢漁舟入得訪秦人家
花源
汝南何景

明

思樂堂

久家湖山上解攬湖山奇先君奉親地堂構開洪
基慨昔未盡樂貽今無窮思傷心夜臺日不照春

園枝

假山

湖山七十二朶朶青芙蓉詎意山中園盡納湖上
峰雕鏤脫鬼斧撇捩騰蛟龍方蓬路縹緲俗子焉
能從

水鑑樓

清池若明鏡照見池上樓開簾對秋月影動紫綺
裘海中金銀闕毛骨寒凝秋莫作彈劍舞夜久驚

潜虬

風竹軒

幽軒繞叢竹四壁風淒清端居不出戶日夕聞秋
聲炎火灑冰雪虛谷張韶英塵氛自相遠獨醒非
我情

蕉石亭

怪石如筆格上植蕉葉清黯然太古色得爾增娉
婷欲携一斗墨葉底書黃庭拂石更盤薄風雨秋

冥冥

觀耕臺

微雨開青春田家事東作曉起臨平臺遂就農父
約鞭牛莫鞭腹束草莫解縛腹裂傷神明草散滋
蔓惡

薔薇洞

百丈薔薇枝繚繞成洞房密葉翠帷重穠花紅錦
張對坐覽六博不知朱夏長香雲落衣袂一月留

餘芳

荷池

紅蓮日相鮮白蓮色如故
穠花多改移澹泊獨
慕衆人愛顏色君子樂貞素
蕩舟古池陰日暮獨
延佇

栢屏

壁立青玉屏下見古栢根
乃知歲寒葉鬱作蒼雲
屯貞姿洗霜雪老氣橫
乾坤名園非此種誰可當

君門

留月峰

明月出海底掛向珊瑚枝玉鏡飛不去中宵光陸
離滿持洞庭酒長歌謫仙辭風吹桂花影歷亂翻

金卮

通冷橋

橫溪斷山麓危梁駕雲徑飛雨鳴寒泉泠泠落清
聽莊生濠上遊孫老天台興無勞千里求卽此托

相贈

花源

靈源出山遠，曲流通溪斜。
春波自何來，往往浮桃花。
我聞林屋巖中隱，古洪厓遡流一相見。
共爾希餐霞。

釣磯

子陵隱嚴瀨，呂望棲磻溪。
龍潛抱雲霧，虎變揚虹霓。
徐君一片石，乃在震澤西。
功成拂衣去，名與二

公齊

姑蘇顧璘

思樂堂

百年行樂地基構得文孫未覺風流遠居然磬咳
存寒暉衰草色春雨舊苔痕手種雙槐樹清陰已
覆門

假山

近割包山巧冥搜笠澤奇晴窓通玉女小石自仇

池不假湍沙水聊歌桂樹枝百年行樂地春雨起
遐思

水鑑樓

高樓凌萬象正俯曲池端盡棟浮晴藻風簾瀉急
湍秋容千丈碧天影一規寒落日相涵照依依十
二欄

風竹軒

清真子猷室觸目總琳琅隱几四簷雨開樽五月

涼瑣窓晴送影金粉細吟香楚調無人會鳴簫引
鳳凰

蕉石亭

春苔封白石風葉展寒蕉院靜浮蒼島窓虛拂翠
翹空山歌細細疎雨聽蕭蕭尊酒玄亭上相看獨
遠罷

觀耕臺

築臺臨野外高處見畊耘春煖一犁雨秋成萬頃

雲閒能歌歲稔靜足念農勤陶令非能稼相看意
自欣

薔薇洞

天台何處是近不出家庭春盡花爭發山深洞不
局晴褰紫絲帳煖壓錦雲屏閒吟謫仙句祇覺思
冥冥

荷池

綠冒小池平涼雲萬蓋傾細香浮露氣踈雨占秋

聲巢葉龜真戲凌陰魚自驚芙蓉濯秋水欲折已
愁生

留月峰

誰穴仇池石分明片月蒼虛涵萬象影常占九秋
光玉女懷寒鏡蒼龍吐夜芒金風日夕至桂子靜
吟香

栢屏

古栢難爲用蒼龍且屈蟠稍從人束縛不逐世摧

殘勁節宜藩屏深盟有歲寒固應霜雪後不復羨

花欄

通冷橋

斷岸水融融飛橋絕水中不容方軌度潛與五湖
通疎雨響璫珮漱瀾卧玉虹使君真長者小試濟

川功

花源

何處碧桃雨飛花渺去津山中自流水物外有長

春路轉纔通棹雲深不見人
洞天曾不遠或有避秦民

釣磯

高士投竿處臨清有釣磯
寒潮洗塵蹟春雨上苔
衣靜與鳥相狎坐看雲不歸
閒趣有佳意不爲魚肥

長洲文徵明

思樂堂

勝絕存朱拱因懷令德遺開堂祇杖屨入室想光
儀圖史貽謀遠湖山發興竒落成非不亟留待後
人爲

石假山

震澤殘山外嶙峋爾亦竒雲根移不斷蘚壁去常
辭短竹煩相媚交藤恐見欺大觀寰宇足幽賞一
拳宜

水鑑樓

樓居臨沼沚情景兩悠然俯鑒一泓水中涵萬象
天魚行朱檻下人立碧波前可是玉堂署能追剡

曲川

風竹軒

鳳鳥棲不定琳瑯時一鳴披窓殘帙亂灑石素琴
清世外煩襟滌林間暑氣平昔賢多曠達千古剩
高名

蕉石亭

怪石峻嶒白山蕉綠更翩盤根深共結入罅巧相
妍夢覺清陰覆書成翠色鮮寸心猶未展雅素獨
君憐

觀耕堂

園亭意不極遠興忽然開沃野晴多曠春風綠又
回老翁分耦去小婦荷鋤來爲爾懷沮溺因憐濟
世才

薔薇洞

旭日繁朝景星葩
粲曉英閒神紛莫辨
流態絕多情陰洞
呈顏色芳春藉寵榮
相憐惟謝朓風蕙寄
新聲

荷池

水榭微薰動清香
暗自通娟娟欣並蒂
歷歷間深叢楚客留
新製吳姬妒冶容
雨微方日夕瀟灑玉
池中

栢屏

古栢層霄立寒屏捧露開坐看青障合時見綠雲
迴密幹風霜注重陰鸛鶴來生憐蒼翠好持此謝

寒梅

留月峰

中峰奇絕處竇月突然留谷響聲先應巖虛白自
浮影斜如望滿光射若探幽莫漫驚神女探珠夜
出遊

通冷橋

曲澗鳴寒玉
涓涓雨後開
細流縈碧藻
遠注濕青
雲
逕轉沿花出
溪迴觸石分
澄心無俗慮
洗耳淨
塵氛

花源

出澤凝香遠
浮堦決溜遲
不須穿虎豹
徑可汲清
漪
勝地開靈脉
浸滢泛曲池
纖纖餘宿潤
默默助
春姿

釣磯

釣石平如掌臨淵意有餘藻含香餌潤波泛碧綸
舒遠意聊觀物閒情豈羨魚因懷渭濱叟富貴有
先書

維楊朱應登

思樂堂

徂謝迫遄期悠邈成今昔平生行樂地徬徨覩遺
蹟寒飈起危館曙露依幽石象設常如存神遊眇
安適

石假山

君家洞庭畔猶嫌去山遠園隈構石岫林際開雲
巘迤邐帶華池崎嶇入層苑不載扁舟來臨流詎
能返

水鑑樓

可憐池上樓俯映池中水點綴畫難成分明鏡相
似雲移芰荷下魚戲房櫳裡素景一披離知有微
風起

風竹軒

琅玕倚易折翠羽紛難拾幽人最惆悵攬衣空佇
立綠竹自便娟復值微風集嗔色颯將寒秋聲輟
還急

蕉石亭

芳草如翠幄亭亭冒巖阿丹梯承晚映碧澗寫秋
柯日入烟霧滿夜來風雨多預愁霜霰至爲樂恐
蹉跎

觀耕臺

東菑及農節高臺試登陟町疃路逶迤陂塘水紆
直歷歷原上耕依依隴間食雖無耒耜勞端居增
歎息

薔薇洞

洞口薔薇樹春來冉冉紅停舟綠水曲携酒綵雲
中穿林入窈窕牽葉望玲瓏祇謂躋攀盡去去轉
難窮

荷池

臨池放蘭桹處處花相屬霞水互參差香風時斷
續上著繡羽亂下睇文魚逐日莫未歸來聊就舟
中宿

栢屏

何時別陵上移根來後庭柔條寫峰勢總葉學山
形白雪不改綠綵雲相對青無勞六嶺側凌虛搏
翠屏

留月峰

陰崖抱嵌竇側景如明月玉氣夜逾妍珠光朝未
滅雲歸暈正滿霧上輪初缺西園讌客處臨玩情
無輟

通泠橋

隔崦聞秋籟行尋窺碧山雨過沙岸曲泉吐石渠
間雲深乍浙瀝風起更潺湲緣源興無極日夕未
能還

花源

曲水寫珍池盈盈送紅萼朝來湖上雨吹此繁花
落旖旎縈魚藻徘徊逗蘭薄含淒眺芳渚坐歎春
銷鑠

釣磯

釣磯上斗折偃卧俯石瀨曾雲來目皆清波鑒衣
帶捫葛聊爲綸持荷還作蓋高情豈羨魚逍遙在
塵外

譙郡薛蕙

思樂堂前饒景色仙郎行處即清虛
怪來觸石翻成恨信有當年徐仲車
思樂堂

奇石何年出水濱峰巒結構儼如真
尋常瞻拜非無意爲憶當時遠致人
石假山

積水秋來一鏡平
憑闌倒影太分明
祇應宦轍多南北
添得霜華兩鬢生
水鑑樓

坐上吟詩增逸思
簷前命酒動高情
知君對此意

何限不獨蕭蕭十畝聲 風竹軒

怪石成峰堪閣筆青蕉似紙更宜書幽人習靜心
無累長日臨池興有餘 蕉石亭

湖上青山山外田仙家種玉自年年登臺試看開
雲力却愛烏犍不受鞭 觀耕臺

薔薇洞口花如織洞裏神仙天上還人世于今仰
安石莫教長自卧東山 薔薇洞

荷花能紅更能白荷葉如蓋復如錢郎君欲聽採

蓮曲試向西池夕照邊 荷池

山林種栢自幽事仙家結屏尤可憐何時携酒共
深酌應得飛花到綺筵 栢屏

道州月巖天下奇君家月竇未應私他年共飲秋
峰下乞與清光照酒卮 留月峰

天台石梁跨烟起鴈蕩飛泉遶磻鳴雨餘策杖獨
行處試聽泠泠琴瑟聲 通泠橋

石磻泠泠流碧水桃花片片泛青春漁郎莫信放

舟入此地元非世上人
花源

山脚磯頭日日來
閒情真對水雲閒
持竿不是求魚者
寄語沙鷗莫浪猜
釣磯
白沙景暘

七十二峰浮五湖
崦西山水賽蓬壺
輞川金谷閒人說
薜荔園中即畫圖
薜荔園

高棟層軒勢若飛
夜臺冥漠掩泉扉
昔人行樂今人憶
祇有空梁舊燕歸
思樂堂

山生花石石成山
幻出峰巒几牖間
不是五丁神

斧鑿何緣三島便躋攀 石假山

空明池水映朱樓 秦女吹簫在上頭 夜半素娥開

寶匣一輪明月掛中秋 水鑑樓

仙家軒館極清幽 疎竹千竿翠欲流 自有冷風驅

鬱暑翻疑長夏似深秋 風竹軒

太湖花石玉玲瓏 更愛芭蕉弄晚風 坐久一亭雲

影亂綠陰浮動酒杯中 蕉石亭

綠墅風和暑氣清 東菑農作喜新晴 食力豈慙徐

孺子登臺親課隴頭耕
觀耕臺

密葉繁枝結洞房
萬紅千紫鬪春妝
莫教一日無歌舞
錦繡叢中醉幾場
薔薇洞

草閣陰陰俯碧沙
清池綠水出蓮花
風歌翠蓋翻珠露
日射紅衣暈綵霞
荷池

編蓬爲戶栢爲屏
黛色蒼蒼四序清
蔣逕不除無客到
閉門終日草玄經
栢屏

峰形如月影參差
霧縠氷輪隱半規
不用班姬將

扇比祗疑張尹畫蛾眉 留月峰

泠泠山礪響松風絕壑雲深一徑通此去赤城知
不遠石梁天上掛飛虹 通泠橋

春盡清溪泛落花中湖別自有烟霞武陵未必如

西崦鷄犬桑麻邑萬家 花源

片石湖心作釣磯投竿終日坐忘歸得魚沽酒磯
頭醉卧看青天白鷺飛 釣磯 後學袁袞謹書

於逍遙遊

陸師道

陸子傳松林高士圖并題

紙本小
挂幅

清風松下來冷然充兩耳安坐不爲動明月涼如水白
雲杳無聲萬籟從此起師道

愛此青松間遺音尋太古惜無知音人空林誰與
伍携琴坐松下不彈自揮塵文嘉題

五粒松含萬壑聲青山隱隱日初沈那知今古興
亡事盡入幽人手底琴顧德育

晚風初起颯如秋千尺長松翠欲流紗帽葛衣涼
似水不須箕踞與科頭徐士義題

陸五湖秋山携卷圖并題

挂幅嘉禾
汪氏藏

紅塵擾擾滿人間十日應無一日閒羨却茂林蒼壁下
獨携書卷對青山嘉靖甲辰臘日師道作

陸尚寶雲松圖并題

寫松青雲裏佳色藹成暮松作不老枝人比長年數

孫克弘

孫雪居竹圖并題

一片瀟湘翠若浮
數竿蕭瑟倚寒流
何人覓得西窓下
六月閒聽風雨秋
爲懷荆汪丈寫雪居孫克弘

外錄

珊瑚網云此贈余大父者又有椿萱芝石圖爲壽

陸治

陸叔平天香書屋圖并題

五領秋青瘴欲消
尉陀城外瑣峩堯
金鵝油暖花爭發



玉兔宮寒葉未凋
明月自吹靈隱栗
白雲誰誦小山謠
天香莫怪誇君采
曾躡仙人上漢橋
陸治

陸包山雪後贈友圖并題

雪深一尺強
堂階盡埋沒
赤腳踏層冰
誅茅覆庭植
笑殺竈下僮
耽奇甚成僻
雪後作此爲友人易薪覆花漫題俚語陸治

叔平山水并題

二幅

萬宇結青蓮
一柱三江合
日月先到扉
烟霞遲明發
變

化生雨雲恍惚見開合冷然覺玄理顧問不能答陽城
陸治

林卧忽經載相隨惟白雲芳陰閒度影馴鳥狎成羣攜
席山仍合裁杯月自分何能同調者相與弄天文包山子
包山子春城疊嶂圖并題

西來疊嶂擁春城出郭徐看島嶼明極目遐瞻青未了
側身高俯綠初平晴巒雲淨空潭影長谷風踈散鳥聲
笑拂當年題勝處青山留得飲中名嘉靖壬子仲夏包

山陸治

陸叔平疎林峰谷圖并題

天朗秋高風氣清
虛疑遠籟動疎林
凭闌極目俯千里
把酒澄懷時一吟
淡暎遠峰宜落日
倦依長谷想歸禽
圖南正好搏雙翼
脫骨逍遙違素心
陸治

叔平倣大癡山水并題

鷄聲茆屋午
靄靄墟烟白
市散人跡稀
山空翠猶滴

陸包山春意圖并題

駿馬繡障泥紅塵撲四蹄歸時何太急日照杏花西

包山秋思圖并題

千山秋寂寂萬木葉蕭蕭詩思誰能領歸鞭人過橋

陸叔平石湖雪圖并題

石湖一夜雪朱扉映玉開無人賦黃竹惟見越王臺

叔平烹茶圖并題

茗碗月團新破竹爐活火初燃門外全無酒債山中惟

有茶烟陸治

陸包山天池仙館圖并題

汪氏
鑒藏

采真瑤島學餐霞洗髓天池煉歲華還指西峰青可攬
彩雲和露擁仙家

叔平杏花白頭翁圖并題

汪氏
鑒藏

翠幕羈狂性聞儔每獨驚風雲徒長翼霄漢正懸情不
識上林好還同出谷鳴脩脩頭上羽疑是伴愁生
右
壬午在陳湖館中作回首已五十二年矣陸治

山禽只恐春狼藉恨向東風愁白頭壬申秋仲陳

柱題

包山沙暖睡鴛鴦圖并題

匹鳥本來雙交棲情自香日高春正暖天遠晝偏長懶
性迷花醉驚魂逐絮狂不知憨態劇烟水逝茫茫

陸叔平錦浪瀾圖并題

池上交花鏡裏妝韶華輝映彩鴛鴦風前湛露濛濛濕
濺入儀毛錦浪香包山陸治

包山松枝喜鵲圖并題

春風海屋開華宴手縛蒼龍到席前
乘子西池問王母
桑田滄海定何年
包山陸治

包山子粉紅茶花練雀圖并題

舌冷風前鳥心香雨後花美人
初睡起含笑隔窻紗

叔平雛黃花影圖并題

汪氏
鑒藏

風掉紫薇落雨催青蕨
齊山窻春夢熟囑爾莫輕啼

包山子畫并題

凡十
二幅

繡壁摩空落日低
遙攀木末聽天鷄
奔流觸石飛晴雪

倒掛懸崖萬仞梯

疎林映雪見江峰
萬疊橫奔走玉龍
沉是晴光開晚照
落霞酣葉錦玲瓏

雪積溪橋行路難
蔽天樓閣鎖重巒
長途日暮西風急
猶爲梅花勒馬看

松下寒泉落翠陰
坐來長日澹玄心
溪頭定是仙源路
開遍桃花正可尋

嘉靖戊申八月既望
包山陸治
花邊何處酒家邨
竹閣沈陰半掩雲
滿地夕陽山徑仄

樵歌隔塢水中聞

疊翠岩堯倚碧空
青娥高髻出瑤宮
微風忽動前溪影
山館盤雲舞鏡中

一川落影明霞色
萬里蒼茫錯錦紅
鏡裏乾坤乍明滅
疎林遙島盡秋空

翠壁飛泉下急湍
谿亭草閣鏡中懸
楓林如錦凭欄外
一片晴峰鎖澹烟

匝塢連坡十里濃
綠陰深處小橋通
平岡宛轉仙家近

雲複山重何處逢

綠樹敷陰翠荇香扁舟十里下橫塘白鷗飛去青山暮
落日唱歌烟水長

山齋高控懸蒼壁自有芳雲時卷舒百尺水簾遮不斷
月明空負夜牕虛

晴嵐雲淨空潭影長谷風疎散鳥聲笑拂當年醉題處
青山留得飲中名

包山山水并題

憑江絕地芙蓉起飛閣攢空玉竦斜席上山河虛萬里
掌中指點十洲花包山陸治畫并題

綠樹沈沈翠藹浮遙山雨過白雲收江深草閣銷
煩暑靜倚虛欄聽急流錢穀題

叔平畫并題

離離楓色動高秋遠黛橫空一抹浮我欲揚舲任超忽
浩歌沿月卧滄洲包山居士

罷釣吹蘆管江風裊髻絲此聲人不解惟有白鷗

知西村題

陸叔平桃源圖并題

樹樹桃花春雨香
武陵何處問漁郎
湖山表裏如圖畫
洞口烟霞天一方

包山子贈筠如畫并題

淇上琅玕落蔭清
影消墨礙萬緣輕
他時五蘊俱亡後
赤脚風梢頂上行
包山陸治爲筠如禪師作

陸包山紅白牡丹圖并題

芳園爛熳百花枝
白白紅紅各有時
冶葉娼條均造化
和風甘雨入華滋
老夫觀物逍遙地
小筆分春竊弄私
日日不妨偷展卷
擾人蜂蝶竟何如

包山綠牡丹圖并題

汪氏
鑒藏

新裁魯縞竊青藍
幻出宮妝別樣看
髻妥湘雲渾莫辨
脂凝猗竹映姿寒
若從帝子當華讌
好向秦樓並倚闌
縱有龜年新協律
誰將清調曲中彈

叔平西府海棠圖并題

翠羽朱鈿虢國妝
曉來新沐露華香
何如馬上東風面
蹴踘歸來帝子旁
包山陸治

東風吹墮胭脂淚
散作妖花一樹丹
可柰五更清夢斷
杜鵑聲歇雨絲寒
陳履端題

錦城二月剪春霞
斜倚東風酒力賒
舞罷昭陽人不見
新妝輕彈碧蟬紗
顧聞題

包山梅花圖并題

夢轉羅浮月二更
夜寒風力損花神
不禁羌笛鄰家起

吹落庭前幾片春

陸叔平海棠圖并題

明妃扶醉打毬回斜倚東風笑未開
仙仗欲臨魚鑰啓
六宮齊擁絳紗來

叔平蛺蝶花圖并題

蛺蝶枝頭逢蛺蝶相看應是此花身
金屏合舞俱迷酒
錦拍吹香總近人

陸包山黃薔薇圖并題

輕韶和露染新黃醉日含風暗度香最是月明新雨後
一番膏沐一番妝

叔平玫瑰花圖并題

翠羽成叢玉作花露杯香瀉紫流霞只愁一笑傾陽蔡
況說相逢衛玠車

陸叔平芙蓉圖并題

交頸鴛鴦並蒂花碧江相映錦成霞天南水盡雲無際
管領秋光一鴈斜

包山玉簪花圖并題

碧葉團陰約素英何如寶髻玉釵橫當年化作雙飛燕
猶是釵兒未死情

叔平葡萄圖并題

一架琅玕翠蔓長秋風吹露壓銀牀珠影光寒凝玉液
冰盤香細綻瑤漿

陸包山了蘭圖并題

客有贈我了蘭開有奇花與凭虛無日不賞酒次隨其

品質會意處乃即賦之積成八絕因圖以爲贈嘉靖甲子七夕包山治

嘗聞東海仙崖種若個分携西峴香細數花枝參造化却因竒偶辨陰陽其花出自廣南兩义一花各成竒偶

不與秋蘭並九英仙葩二八自天成祇緣無力禁香重幻作斷支駕玉莖每莖十六花花各一义

新裁魯縞衿秋衣肌骨冰瑛酒暈微獨立嫣然風自舉

低迴翻學舞容璣
心帶微紅迎風舞動

亭亭浴露立西清
淡薄秋容幻態輕
獨有檀心禁不得
一庭香思動蜂嬰
直幹玉立露下猶香

玉戟稜稜應節分
枝枝柔玉紉香雲
凝妝擬待三更月
露染生綃六幅裙
花枝應節六葉叢生

方宜輕翼竊青黃
製得霓裳稱淡妝
香抱幽懷嬌不語
含情渾欲待迎將
瓣若輕綃微帶青黃

瓊幹冰叉藥玉容
細枝香魄引玲瓏
分明月下歸環珮

恍似羅浮夢裏逢
弱帶下垂花英若佩

三尺丰標高髻妝
兩行釵玉一匳香
朝朝擬待烟屏展
徐攬輕羅上畫堂
葉過三尺花多曉
發左右平分

外錄

珊瑚網云余初得一幅細入者是此復得一幅寫
意者詩只六首起句云廣東梁中舍遺我

陸叔平爲事茗寫壽圖

外錄

書畫舫云叔平曾爲事茗寫壽圖布景尤異落筆精微以較生平漫興之作真天淵矣此本今在陳

氏

陸包山茗外幽賞圖并題

絹本小挂幅青綠雲山澗泉奔瀉林間逸士淪茗高

論

茗外寄幽賞琴中饒濮音一音灑毛骨萬象開靈襟蚬
竅戰水火月團破璚琳餘音與遺味優矣澹玄心包山
陸治

草綠江南興已催月團今復試新裁知君再著春山屐
虎阜岡頭帶雨來嘉靖壬子友人携琴過訪試雨前
茶作此後二十三年早春復與同試陸羽泉重題乃萬
曆乙亥三月三日也而余已八丙七辰矣書此以紀歲
月陸治識

陸叔平春和衆芳圖并題

絹本中挂幅淡色丘壑靜
嘉花樹明媚山樓松道人

物悠然洞口停舟
勢鬚桃源之境

春和衆芳啓風塵復靖嘉華景與時會歡悰情彌加心

遠地亦偏邛園賁幽遐閒門閉白日中有桃源花清時
謝簪組朱顏注丹砂幽風啓春筵庭除茁蘭芽白華藹
玉樹綠酒傾流霞素心多至人觴詠成天葩款款繼晨
夕悠悠邁年華道在惟所敦期頤安有涯嘉靖丁巳元
旦後學陸治題上陽湖先生

錢穀

錢磬室梅花鍾馗圖

款書

庚午臘月廿又四日寫錢穀

英風蓋世正氣近真民間柱石先朝直臣虹飛寶劍邪不敢臨百千妖厲化爲空塵悟因弟子贊

錢叔寶樊川詩意圖并題

入細青綠山水汪氏鑒藏

南陵水面漫悠悠風緊雲輕欲變秋正是客心孤迴處誰家紅袖倚高樓已丑冬十一月既望寫樊川詩意錢穀

右樊川詩意宋顧大中曾於南陵巡捕司舫子卧屏上畫此詩意而人不知其名未甚賞譽後爲人

具眼者竊去乃更歎息磬室因倣其意作此遂爲
精絕天啓辛酉春湯玉林共文氏萬壑松風持來
俱有顧硯山印記余家玉鑲椰盃亦鐫硯山山房
愚父子遂得二畫與盃供一室恍身在顧氏玉泓
館不獨樊川詩意也汪砢玉識

磬室蠶桑圖

汪氏
鑒藏

款書

甲寅二月十日寫錢穀

夜被深功藏蠶動碧筐火煖起眠時題詩勸爾加

餐葉四月吳民要買絲文嘉

春到柔桑葉漸肥
傾筐高疊露華歸
金刀切罷蠶眠起
翹首迎人似訴饑
彭年

錢叔寶秋山高隱圖

紙本水
墨小幅

之果先生與先君子交最久最昵此畫在蕩口舟
中所作忘記歲月款識今先生仲君養誠兄携以
示余乞識其真余小子敢於佛頭上著糞耶此畫
細密初非潦草思致深遠步武衡翁全非本色第

今耳學輩動以無款爲歟百方覓彷彿贗書者補其名真本有之大爲之點汙政不知唐宋名筆何嘗有款南宋馬遠父子於竹根石隙細書小字俾快觀者一時不可得至於松雪大癡始濫觴云耳即先君子此畫模索可知即無款將屬之何人哉養誠兄幸善藏之勿輕示耳學俗子可也萬厯庚申仲秋廿二日允治題

吳門顧元方氏家藏

項元汴

項子京荆筠圖并題卷

荆筠圖 乙丑秋七月王穉登書

入林聽擊竹選地靜班荆 龍淵慧空上人持素索余
繪荆筠圖爲友人世賢汪君而徵其別號者遂併題一
聯以呈手眼云墨林項元汴寫于櫻寧巷

余家李父畫蘭竹樹石頗妙絕至山水間亦佳勝
然求完壁甚難惟此卷墨氣筆法俱自有神當入

元鎮孟端堂與矣是或緣慧空上人之請而荆筠
翩翩典雅足可重之謂耶荆筠其實之萬曆癸巳
八月朔日項德裕識

芳洲一水長種竹繞滄浪不雨朝常暝非烟夏亦
涼采枝爲杖紫裁籜置冠黃試待花成實青冥下
鳳凰伯穀王穉登

憐君點筆寄滄洲烟雨瀟瀟滿紙秋何日當攜葛
陂杖御風還作渭川遊凌虛張鳳翼

翠葆搖鳳尾分秋聲萬斛隔窓聞庭除石友魚
花客日日相看對此君吳門周善繼

蕭蕭風雨滿滄洲帝子凌霄玉佩秋雲散楚天今
夜月田君好共此君遊神卿蔣元龍

一派湖州畫裏詩娟娟風篠兩三枝今朝汶水帆
前雨正是龍孫長籜時董其昌

此詩見白陽畫
冊今朝作朝來

先子愛荆字世賢別號荆筠山人弱冠時與慧空
慧鑑大洲竹堂定湖諸方外遊同識子京公是卷

其初購之者也後更求子京作愛荆圖倣趙伯駒
成青綠山水款云墨林子項元汴爲孝友汪君寫
不知者俱疑非子京本色焉萬厯丁未夏華亭蔣
神卿過訪留款三宿臨別次伯起韻題卷至丁巳
春董太史玄宰來吾家鑒賞書畫亦題卷後數十
年間得諸名流爲先子增重誠快事也不意崇禎
戊辰春遭內外艱營殯事典質古玩是卷并周服
卿號圖被友人強作媵物愛荆圖爲盛氏所覩竟

蹈前轍未幾余力索茲軸歸歷癸未初夏凡十六
載矣此友忽持二卷來欲易余唐六如山水姚雲
東畫菜及六凡雙繡悅余與兒淵惟其意而莫違
遂復還舊觀庶不致平泉失守遺憾千古冥冥中
或亦禪寂諸老宿之力歟龍惕子汪砢玉識於韻
石齋

墨林畫并題

磴轉懸崖石松聲雜澗淙

香巖居士畫并題

石路少經過山雲自來去爲問高人居更在幽深處

外錄

珊瑚網云二幅久在凝霞閣先君與項氏蘭臺暨
長公西山相善并倣梅道人洞庭漁父墨荷蘭石
及所書高士傳俱遺之餘爲友人乞去者不少

項德新

項又新倣大癡山水并題

雲過釣處峰疑吐石瞰桐江水自灣信手拈來竟誰是
神游子久富春山做大癡筆項德新

復初墨竹圖并題

桐陰洗硯墨生香又道清閒又道忙忙裏閒情人不識
一枝風篠破愁腸爲玉水兄寫德新

又新竹圖并題

汪氏
鑒藏

興到不知風起處自有秋聲湊筆來

項復初墨梅圖并題詞

憶昔黃昏一枝清瘦有懷如隔但覩寒梢仍標凍蘂慣
曾相識 去年折損低枝尚兀自教人憐惜鶴驚尋踪
蹇驢踏雪何須金勒 右未開

明珠斛量粉肥紅綻欲試新妝晴日初烘多情含態漏
洩馨香 一春消息難藏掩芳唇欲吐衷腸未許蜂知
還嫌月缺倚遍迴廊 右將開

瓊脂勻搭酒暈香肌韶華一霎皎皎庭前低低牆外疎
狂遠匝 曉牕對鏡慵妝見翠羽嘈嘈輕壓纖手簪花

折枝驚起池塘睡鴨 右盛開

凋謝南枝雨淒風緊每恨來遲水驛烟波壽陽嬌嬾一
任紛披 還愁青子催期又早是羌笛聲悲待等和羹
萬花俱後纔信逢時 右開殘

補之有梅花卷上有柳梢青四詞予作此枝追和其韻
似玉水兄郢正弟德新

項又新墨荷圖并題

焦墨濃淡成花葉是
寫生中最得意之筆

嬌花迎露發翠蓋逐風狂短櫂菱歌處清溪水殿香

無痕秋水映簾櫳翠蓋輕柔弄曉風誰道江清能
醒酒碧波終日照微紅日華題又新畫

外錄

珊瑚網云項君復初爲墨林公第三子博雅好古
翩翩文墨閒與余契厚有年每過余齋頭或跌梅
根話月或蹕松巔語風或移燈寫石影或剪燭辨
花色揮毫染素忘倦余亦時詣其讀易堂出所藏
書畫玩好鑒賞不休意甚洽也不意癸亥冬日余

自北還項君已謝人間世矣爲繹韻言之云斗酒
無從共論文廿年雅誼付斜曛黃金臺去空還我
白玉樓成竟召君詩卷曾題梅上月畫圖猶帶竹
邊雲堂留讀易看多構莫嘆人琴不再聞時展其
小阮孔彰爲余作鴛社圖念斯際正欲補繪未盡
景致恨不即促之與墨荷諸幅俱留不朽佳蹟可
勝山陽之感

宋 旭

宋石門西方三聖遊戲園林圖并題

無量壽佛勢至觀音衆生慈父誓願弘深應機廣度悲
智同心或遊池沼或戲園林隨順根器善誘規箴上智
了達中下沈吟再喻再攝咸使歸欽一即一切萬象森
森一切即一互顯互臨長河酥酪大地黃金惟心惟佛
過去來今天池髮僧祖玄

即宋
旭

景西居士天台圖

小幅

款書

萬曆壬午腊月八日宋旭作

夢游同汝坐莓苔瀑布懸崖萬丈來夢裏瀑聲還
撼夢不知真個到天台送編通遊天台作陳繼

儒

徐渭

徐文長寫生十二圖并題卷

紙本高九寸長一丈六尺水墨寫生十二段筆

氣俊逸墨光鮮潔
如見握管大呼時

漱老墨謔

橫書紙本引首

鵬飛處人

一段墨牡丹飛白竹

墨點嬌姿小絳勻箋中亦足賞青春長安醉客韉爲崇
去踏沈香亭上塵

一段杏花

道人懶爲著色物偶施小茜作嬉游人言杏花可摘賣
挂向街頭試買不

一段荷花

肥甘座上不須查濃醴筵中可少茶鵝鴨街頭差免俗
鏡湖大葉數莖花

一段玉簪

老夫一掃秋園卉六片尖尖雪色流盡用邢州沙萬斛
未便琢出此搔頭

一段菊花

身世渾如拍海舟關門累月不梳頭東籬粉蝶閒來往
看寫黃花過一秋

一段芙蓉

荒沼芙蓉寫一枝即令憔悴不勝姿文君賣酒成都日

獨立壚頭無侍兒

一段芭蕉

種芭元愛淥漪漪誰解將蕉染墨池我却胸中無五色
肯令心手便相欺

一段墨石水仙

自從生長到如今烟火何曾著一分湘水湘波接巫峽
肯從峰上作行雲

一段梅花

曾聞餓倒王元章米換梅花照絹量
花手雖低貧過爾絹量今到老文長

一段玫瑰

灑墨爲花醉小樓甜香已覺入清喉
何因摘向金陵去短櫺長丁泛茗甌

一段山茶

聞道昆明池水東四時都賞寶珠紅
世味長穠不長久所貴鶴頂紅雪中

一段螺殼蒲草

真珠螺肉殼僊藥虎鬚蒲

文長徐山人不特中郎以爲有明一人也當日沈青霞君曰自某某以後若干年不見有此人武進唐先生亦謂殆輩吾後今去山人八十八年矣山人嘗自言吾書第一詩二文三畫四則花草竹石其旁溢者然余見三集逸稿及手鈔散帙動多題句所云世間無事無三昧老來戲謔塗花卉又云

不求形似求生趣根撥皆吾五指栽豈固如登州
蜃樓邪此卷杏花玉簪菊水僊蘭玫瑰花載三集
荷獨朵芙蓉淺色牡丹詩載逸稿餘若梅花用元
章換米事茶花用昆明事畧與集同而另爲一首
芭蕉句差減於集虎鬚蒲止五言二句見鈔本而
集中有賦客強余畫十六種花者有賦余作花十
二種者皆七言古詩又有賦畫百華卷與史甥題
曰漱老謔墨者茲則寫十二種各題之而標以漱

老墨謔別爲一卷而玉簪詩老人作老夫玫瑰詩
畫裏看花不下樓作灑墨爲花醉小樓無因作何
因小有同異文人涉筆往多類是於是書與詩與畫
具此矣文則備己未梓本行事詳於自銘畸譜及
陶袁兩傳宜考鑑也辛酉書示勝吉於漱藤阿重

山瑒

紙本
卷後
紫

王問

王仲山聽秋圖并題

汪氏
鑒藏

萬木森森起翠濤一道懸泉如瀑布小橋盡日聽秋聲
忘歸迷却來時路仲山王問寫

子裕山水并題

小挂幅

幽泉未出山潛與元氣結淒霏散爲雲谷口薜衣濕

王僉事俸鶴圖并記

嘉靖戊申王仲子疏歸寶界山間居十四年矣一日偶
坐松下忽有孤鶴從西南來集松頂鳴舞終日乃去諦
視之乃予向所俸鶴哀其窮而縱之者予惟天地間物

各欲自遂其性予昔侔之雖甚寶惜終非其性茲處海
嶠上下寥廓飛翔自如已無復人間世矣來集松頂豈
有意故墟哉因圖此書侔鶴田記于左侔鶴田舊名
爰居處於魯東門祀以太牢祀以鐘鼓而爰居弗樂何
也以已養養之也然則鶴可侔乎有官則有侔鶴有官
乎禮曰考其弓弩以上下其食鶴有職事乎其食可上
下乎鶴產于青田翔于紫蓋啄東海之鱗食鉅野之粟
時乘雲氣遊太虛凌倒景逍遙鳴舞於無何有之鄉將

偕鳳毛而獻瑞齊鵬運以圖南也今鍛其羽內之欄中
儲田粟日給數合盛以瓶盎漉以清泉而食之食則得
矣吾見其循牆而走不勝悲也命童子縱之三月翅成
鶴飛去仲山王問識

仲山木筆花圖并題

中郎宅裏花滿庭辛夷花發玉分明素色幽香比君子
謝家珍樹何如此主人愛花世莫論酌酒邀賓夜未已
十二欄干清露溥此花猶稱月中看僊姝淡掃蛾眉細

聽徹玉簫騎白鸞歸別銀燈寫花影龍尾鳳翰幽事并
髣几橫披白霧綃春睡朦朧喚花醒仲山玉問寫於崇
文館

沈士蘭

沈士蘭凝霞閣圖

款書

甲午夏日爲愛荆先生寫

城南高閣枕湖頭繡栢文璫映碧流石榻漫陳霞
作幙湘簾半捲月爲鉤敲詩午夜驚牛斗對客花

朝聲鷓鴣不必然
藜奇夢醒一聲長
嘯落滄洲梅
癡道人周履靖

日照君家近水樓
層檻曲折宿烟收
天香桂子當
窓落霞影蘭蓀倒
檻流壁上畫圖皆
晉宋牀頭爨
鼎盡商周懸知閒
夜茗鐺煖岸幘端
爲看月留元
雅高松聲

莫謂幽棲遠市廛
知君心逸地應偏
臺空夕照禽
聲洽簾捲朝陽樹
色鮮四顧雲霄新
氣象一屏圖

畫舊山川翻嬾作賦悲王粲只合賡歌大有年野
濱王復元


倨俛雲起五湖東稽古幽歡曲檻中每弄翠樽先
月上暫拈碧篆忽霞蒙春城楊柳屏間綠秋水芙
蓉鏡裏紅更有高齋得清賞品題奇石興無窮澄
甫沈瀚

聞君高閣市南頭畫棟朱甍曲檻幽畫信春風吹
簡帙夜容明月上簾鉤仲宣此日空懷賦庾亮當

年漫倚樓肯許一樽同
笑傲貧家亦典驢
驢表存
素葉應時

閒君饒逸興
依水築岑樓
簾捲朝霞勝
牕披夜月幽
登臨無俗駕
詞賦盡名流
余愧繩樞子
閒時許暫遊
耕巖散人王淑民

石隱稱高尚
岑居遠俗氛
簷前兩湖水
牕裏一床雲
滿壁惟圖畫
充梁亦典墳
只應詩酒客
可與閣霞羣
秋潭智舫



書畫彙考卷五十九